

Mchungaji Huwaita Kondoo Wake kwa Majina

Aingiaye mlangoni ni mchungaji wa kondoo.... Kondoo humsikia sauti yake; naye huwaita kondoo wake kwa majina yao, na kuwapeleka nje. -Yohana 10:2, 3.

Njia ya mwenye haki ni njia ya amani. Ni wazi sana kwamba mtu mnyenyekevu, anayemcha Mungu anaweza kutembea ndani yake bila kujikwa na bila kupita katika njia zilizopotoka. Ni njia nyembamba; lakini watu wenye hulka tofauti wanaweza kutembea kwa pamoja ikiwa tu watamfuata Nahodha wa wokovu wao. Wale wanaotamani kuendeleza tabia zao mbovu na desturi ya ubinafsi hawawezi kutembea katika njia hii, kwa maana imenyooka na ni nyembamba.

Ni jitihada kubwa anazochukua Mchungaji Mkuu ili kuwaita kondoo Wake kwa majina na kuwaalika kufuata katika nyayo Zake. Huwatafuta waliopotea. Huangazia nuru kutoka kwenye Neno Lake ili kuwaonesha hatari yao. Anaongea nao kutoka mbinguni kwa kuwaonya na kuwakaripia, na kwa mwaliko wa kurudi katika njia ya haki. Anatafuta kuwasaidia wakosaji kwa uwepo Wake na kuwainua pale wanapoanguka. Lakini wengi wameifuata njia ya diambi kwa muda mrefu kiasi kwamba hawataisikia sauti ya Yesu. Wanaacha yote ambayo yangewapa pumziko na usalama, wakijisalimisha kwa uongozi wa uongo, na kwa kujiamini wanaharakisha katika upofu wa kujiamini nafsi, wakienda mbali zaidi na zaidi kutoka kwenye nuru na amani, kutoka kwenye furaha na pumziko....

Msalaba wa Kristo ni tumaini letu pekee. Unatufunulia ukuu wa upendo wa Baba yetu na ukweli kwamba Mtukufu wa mbinguni alivumilia matusi, dhihaka, fedheha na kuteseka kwa ajili ya kuwezesha roho zinazopotea kuokolewa katika ufalme Wake. Ikiwa unawapenda watoto wako, hebu na liwe somo lako kuu la kuwaandaa kwa ajili ya maisha yajayo, ya kutokufa.... Fanyeni kazi mchana ungalipo, mkiukomboa wakati na mkaipokee taji ya utukufu usiokoma. Jiokoe mwenyewe na nyumba yako, kwa maana wokovu wa roho ni wa thamani (Testimonies for the Church 4:502, 503).

Waume na akina baba wengi wanaweza kujifunza somo lenye kusaidia kutokana na utunzaji wa mchungaji mwaminifu. Yakobo, alipoombwa kufunga safari ya haraka na ngumu, alijibu:

“Watoto ni wachanga, tena kondoo na ng’ombe nilio nao wanyonyesha. Hao wanyama wakiharakishwa siku moja, watakufa wote.... Nami nitawaongoza polepole kwa kadiri ya mwendo wa wanyama walio mbele yangu, na kwa kadiri ya mwendo wa watoto” (Mwanzo 3:13, 14).

Katika maisha yenye sulubu hebu mume na baba “aongoze kwa upole,” kwa kadiri mshirika wa safari yake anavyoweza kuvumilia. Katikati ya shauku ya ulimwengu ya kutafuta mali na mamlaka, hebu na ajifunze kuzuia hatua zake, kumfariji na kumuunga mkono yule anayeitwa kutembea kando yake (The Ministry of Healing, 374).